

Regional News Unit AIR Aizawl

Tuesday, August 13, 2024

Time - 7:30 -7:40Hrs

REGIONAL NEWS BULLETIN

HEADLINES (MORNING)

- **ZPM flagship prog- Banakaih-Handholding Policy kalpui dan tur Chief Minister Pu Lalduhoma hovin ngaihtuah a ni.**
- **Congress Party chuan sawrkar in sawhthing tha leh thalo an thenna Grade an sawi ang chu mipui ten an tharchhuak thei angem tih chu an zawhna a ni, an ti.**
- **National Institutional Ranking Framework (NIRF) 2024 in zirna in sang Higher Education Institute tha a tehnah HLT Madras chu a pumpuiah pakhatna a ni..**
- **Sawrkar laipui chuan PM-Surya Ghar-Muft Bijli Yojana hnuia Model Solar Village tihhlawhtlin dan tur kaihruaina a ti chhuak**

<><><>

CM

ZPM flagship prog- Banakaih-Handholding Policy kalpui dan tur ngaihtuahin nimin khan CM Conference Hall ah Chief Minister Pu Lalduhoma hovin Mizoram State Policy Coordination Committee leh Implementing Department hotute an thukhawm a,

Chief Minister chuan, Hand Holding Scheme chu tlangzarh an chak tawh a, tihtur tul la awm apiang te chin fel vat vat an duh tawh hle a ti a. He scheme hi bank te nena tangkawpa kalpui tur, central scheme awmsa thenkhatte nena convergence a kalpui tur a ni a. Progress Partner te tana rulh leh ngai hmalakna deuh zel a ni tih sawiin dahkham erawh a ngai lo, a tithe tana interest awm lo a ni thung a ni a ti.

Bana Kaih Policy chu Loan deuh veka kalpui tur a ni chungin eizawnna tha taka lo kalpui mek tawh sa, tlemazawnga han puiha hmasawn dawrh thei te puihna tur bik CM Special Package siam a ni dawn tih sawiin, tanpuina sum erawh a tam thei lovang a ti a. He Special Package dawngtu tur hi Implementing Department te bawkin an thlang ang a, an vil zui bawk ang, a ti a. Kumin bik hi pilot project angin kan kal phawt ang a, a tul ang zelin an tilian chho dawn a ni, a ti.

Pu Lalmalsawma Pachuau, Member Secretary, MSPCC leh Planning Secretary ni bawk chuan Hand Holding kalpui dan tur duan tawh te sawifiahna a nei a. Pu LP Lalchangkima, MD, ZIDCO chuan Interest Free Loan kalpui dan tur leh garantor-a sawrkar a tan dan tur ruahmannna te a sawifiah ve bawk.

<><><>

ZPM PR

Home Minister Pu K.Sapdangan, “ Ration Card, Assam ramri leh Airport chungchangahte thu belchian dawl lo hmangin eptuten mipui rilru hruaipen tumin an tithlabar fo a ti.

Nimin khan ZPM chuan Party Office-ah chhung inkawm hun a hmang a, hetah hian thusawiin Pu K.Sapdanga chuan Eptu party-ten ration card chungchanga mipui thu an fah dan a dik tawk lova, chhungkaw khawsak ziaawm zawk Ration Card var hmangtuten sawrkar atanga buhfa Subsidy-a an leina man tihsannaah hian chhungkaw harsa zawk Ration Card Eng leh Ration Card Pawl hmangtute a huam lo a ti a, tunah hian Supply Minister hmalaknain Ration Card siam that hna kalpui mek a ni a, chhungkaw khawsak harsa zawkte tan phurrit tur a awm lo,a ti.

Home Minister chuan tunhnaia Assam lamin an duty camp bul leimin an thenfai chu eptu party lamin mipui tihthlabarin nan hmangin thu an vawrh darh leh vak mai a, hetianga thu belchian dawl lo hmanga mipui rilru an kuai peng thin hi a pawi a ti a. Assam Sorkar nen pawh ramri chungchangah tha takin meeting an nei a, hmasawnna hmuh chhoh mek a ni, a ti.

Airport chungchangah pawh Mizoram tana tha tur zirchianna neih anih chauh laiin, eptu party lam chuan thutlukna siamfel ta ang maiin thuthang dik lo an vawrh darh leh chiam mai a ti a, sawrkar tha nei tur chuan Opposition party tha tak neih a ngai a, chuvangin Opposition Party-te pawhin sawrkar tiibuai tum nan thubelchian dawl lo an hmang fo a, hei hi mipui nuihzat leh rin loh hlawh theihna a ni, a ti.

Home Minister chuan, an hmalakna aikal tihbo chu thenkhatin an huphurhpuiin an tih theih an ring lo hial a, sawrkar hmalaknain department tinah aikal an neih leh neih loh zawh a ni a, aikal ti tawp tura thuchhuah siam a ni bawk a, ti tawp lo department an awm chuan department hotuten mawh an phur dawn a ni a ti a. Aikal tih tawp avang hian mipuiin harsatna engemawchen chu an tawk ngei dawn tih sawrkar hotuten an hmu tlang vek a, amaherawh huaisen tako ram siamthat hna kalpui a ngai a, mipui pawh an chhel a ngai hle a, hun a kal anga thil a la rawn inher dik mai dawn a ni,”a ti.

<><><>

NASHA MUKT BHARAT ABHIYAN

Sorkar laipui Ministry of Social Justice and Empowerment ruahhman angin nimin khan District Administration, Lawngtlai bul tumin Lawngtlai khawpui chhunga zirna In hrang hrangah “Nasha Mukt Bharat Abhiyaan (Drug Free India Campaign)” neih a ni.

Lawngtlai District- ah chuan 'Nasha Mukt Bharat Abhiyaan atan hian District Bawrhsap ruahman angin, Lawngtlaia Officer ten zirna In hrang hrangah thu sawiin hun hman a ni a, ‘Nasha Mukt Bharat Abhiyaan puala ruihhlo ti lo tura intiam kamna sawi rualna hun hman a ni.

Nasha Mukt Bharat Abhiyaan pual hian Kolasib district chhunga Village Council leh zirna In thenkhatah te pawh hun hman a ni a, zirlai ten ruihho ti lo tura thutiam sawi rualna hun an hmang.

Deputy Commissioner’s Office, Siaha kaihhruainain Nasha Mukh Bharat Abhiyan ruihhlo tilo tura intiamkamna chu hmun hniha neih a ni a, DC Office tual zawlah SDO (S) Pu Vanlalchhuaniana kaihhruiana in zirlai naupangte leh mipui thahnem tak ten ruihhlo laka fihlim turin thutiam chham rualna an nei a, hei bakah hian DC Conference Hall-ah Siaha khaw chhunga Head of office - te chuan hemi puala sawrkar laipui in a buatsaih, Union Minster of Social Justice & Empowerment Dr Virendra Kumar khuallianna hnuaia programme an hman chu video conference hmanga chhimin pledge chham rualna an nei bawk a ni.

Nasha Mukt Bharat Abhiyaan in a tum ber chu thalai te ruihhlo tilo tura zirtir leh tanpui ngaite tanpuina hmun hrilhhriat leh hruaithlen niin August ni 15, 2020 khan tan a ni a, tun dinhmunah **Nasha Mukt Bharat Abhiyaan (NMBA)** hian thalai vaibelchhia 11.2 tleng phak tawhin, thalaite ruihhlo ti lo tura inzirtir piah lamah nakin lawka ram hruaitu tur an nihna hre reng tura an fin leh thiamnate ram leh hnam tana hmanga India ram 'Viksit Bharat-Developed India' tura theihtawp chhuah tura inzirtirna a keng tel a ni.

<><><>

KHAWZAWL KVK

Khawzawla Krishi Vigyan Kendra thawktute chuan nimin khan Aiduzawla sawhthing chingtute chu Sawhthing chin, enkawl leh processing chungchangah training pek an ni a, Dr. Malsawmkimi, Senior Scientist & Head leh Pu Rambuatsaiha, SMS (Agronomy), KVK Khawzawl ten zirtirna an pe a ni.

He hunah hian Kuthnathawktute chuan an sawhthing chinna kawnga an harsatna hrang hrangte sawiin, sample an lo ken atangin Bacterial wilt, Shoot borer leh Rhizome rot te hmuh an ni a, heng sawhthing natna hrang hrang enkawl dan tur leh ven dan tur te hi hrilh hriat an ni.

Aiduzawl khuaah hian sawhthing chingtu chhungkua 54 awmin, training hi an chhim kim thei vek a ni.

<><><>

MPCC PRESS CONF

Mizoram Pradesh Congress Committee (MPCC) chuan sawrkar in sawhthing tha leh thalo an thenna Grade an sawi ang chu mipui ten an tharchhuak thei angem tih chu an zawhna a ni, an ti.

Nimin khan Aizawl Press Club - ah thuthar lakhawmtute kawmin, MPCC Treasurer Dr. Lalmalsawma Nghaka chuan tunhnaia Agriculture Minister leh Adviser to CM ten sawhthing lei leh hrall chungchange hmalak an tum dan thenkhat an sawi chu sawhthing chingtute tan him lo leh hahthlawnna tur nia thei an hriat thu a sawi a.

ZPM sawrkar sawhthing then tum danah 'Grade A' chauh cheng 50 leh a chunglama lei tur an ti a, Grade B chu a chingtute leh a leitu te inbiakremna tura an dah chu tha an ti lo hle tih sawiin. Mizoramah Sawhthing hi grade a then anih kan hre ngai lova, an then anih chuan Grade then dan tur, a quality eng chen nge tih inkaihruaina a awm loh bakah a leitu ten 'Grade B' anga sawhthing quality an then teuh chuan a chingtute a tuartu an ni dawn a, hei hi a thalo hle a ni, a ti a.

Khawpui mi sawhthing ching tute ta an leisak dawnlo an ti pawh thalo an tih thu sawiin ZPM chuan an Manifesto angin society a in register te sawhthing leisak an ba a, chutih rualin khawpui mi pawh nise an sawhthing chinna khua a society ah sawhthing a chin anga in register chu an phalsak ngei tur a ni a. Khawpui mi sawhthing ching te hi sawrkar hian a ngaihven tur a ni a, a thlahthlam ngawt bik tur a ni lo, a ti.

Society din chungchangah Society hruaitu tur te chu sawrkar official te lo tawiawm tura beisei an nih laiin, khaw khata rulling party hruaitute an inruat mai niin a lang tih sawi bawkin Sawhthing lei leh hralth hi society kaltlanga siam tur anih dawn si chuan ZPM Membership fee lak nan hman tumna a awm ta mai em ni tih chu an zawhna a ni a ti.

MPCC Treasurer chuan Sawhthing leina tur, Minimum Support Price pekna tur chu a hranpa in Budget ah a awm lova, Banakaih policy hnuaiah vaibelchhe 200 dah a ni a, nikuma thlai thar leina vaibelchhe 110 an dah, an la hman loh nen cheng vaibelchhe 310 awm anga ngaih theih a ni tih sawiin. Sawhthing hi sawrkar chhut danin quintal nuaih 10 vel Mizorama thar tura ngaih a ni a, Sawhthing thar tur sawrkarin a chhutchhuah zat ngaihtuahin a beitham hle tih a sawi bawk a ni.

MPCC Treasurer chuan Sawhthing chawh hun chungchangah ZPM in ruahmanna siam a tum chu ngaihtuahchuan ngai ani a ti bawk a. Sawhthing chu a chawh hunlaia chawh loh chuan sawhthing quality a tlahniam thei a, chuvangin thlai chingtute chawh hunbi siamsak chu a tha lova, a hralth theih hunchhunga an hralth vek theih nan ruahmanna siam turin ZPM sorkar an phut tih a sawi a, Hmunphiah an ti zuzi ang khan tih zuzi chi a ni ve lova, nem liam a, Agent thiamloh a ni ber mai, tih ngawt chi a ni ve lo, chhungkua leh khua a nghawng tam lutuk a ni a ti.

<><><>

MNF COMPLAINT

MNF Legal Board chuan Vanglaini nitin chanchinbu in AMC Ward VI-na independent candidate, MNF candidate anga an ziah chungchangah AMC Ward VI by Election Returning Officer, hnenah lehkha an thehlut a.

He lehkhaah hian, "Vanglaini, Mizo Daily newspaper, Zirtawpni-a chhuakah khan phek hmaah 'ZPM leh BJP candidate-ten nomination paper an thehlut' tih thupui kaihhnawiha thuзиakah "MNF Candidate Lalrinfeli chuan August ni 7 khan hming a lo pe lut tawh a ni,' tiin tarlan a ni a. Hei hi mipui rilru dik lo taka hruai pen tumna a ni tih sawiin, Lalrinfeli hi MNF candidate ni loin, Independent candidate, RO hmaah ngei ah a thehlut a ni an ti a,

Hetianga thuзиakah hi mipuite tichiai thei zawng leh hrereng chunga thiltih a ni an ti a, ngaihdam dilna anmahni chanchinbu ngeiah chhuah tura thu pe turin an ngen tih an sawi a ni.

<><><>

BJP MIZORAM

BJP Mizoram Political Session nimina neihah State Core Group Member Dr K Beichhua MLA chuan thusawiin, state lo kaihruai tawh tute zingah mipui hmaa thu sawi teuh teuh a, hnathawh erawh tlem leh thung si an nih vek avangin Mizoram mipuiin ei leh bar zawnna kawng ah leh nitin nun phungah pawh angaihna hrelovin laklawk takin, tuilai rapin an awm phah a ti.

Dr K Beichhua chuan, Mizoram mipui te chu nguntaka ngaihtuahna seng turin a sawm tih sawiin, BJP Party erawh chu kalphung ng het leh Vision mumal tak nei a hruai an nihna angin, tawngkam mai nilovin thil tih in ram an thahnem ngai takin an hruai mek a ni a ti.

MLA chuan Tun hnaiah Delhi lamah Ministry te dawrin ni 9 an zuk cham tih sawiin Central Minister hrang hrang te hnen ah Mizoram mamawh an thlen a, Chung zingah Central Agriculture College leh Central Medical College Mizoram tan an dil tih sawiin an thil dilah an hotu ten an duh sak hle a, tih sak ngei an tum thu pawh an hrilh niin a sawi a ni.

<><><>

NIRF

National Institutional Ranking Framework (NIRF) 2024 in zirna in sang Higher Education Institute tha a tehnah IIT Madras chu a pumpuiah pakhatna a ni. Indian Institute of Science (IISc) Bengaluru chu pahnihna niin IIT Bombay chu pathumna a ni a. NIRF ranking hi Union Education Minister Dharmendra Pradhan chuan nimin khan New Delhi ah a tlangzarch a. University Category bikah IISc Bengaluru, Jawahar Lal Nehru University, New Delhi leh Jamia Millia Islamia, New Delhi te chu a sang pathumah an awm a. Engineering Category ah IIT Madras, IIT Delhi leh IIT Bombay ten an dawt a. Management ziranaah IIM Ahmedabad chu pakhatna niin IM Bangalore leh IIM Kozhikode ten an dawt a. Medical lamah AIIMS, Delhi chu sang berin ost Graduate Institute of Medical Education and Research (PGIMER), Chandigarh leh Christian Medical College(CMC), Vellore ten an dawt a ni. College tha tehnah Hindu College, Delhi a sang ber a, a dawtah Miranda College leh St. Stephen's College Delhi ve ve te an awm a.

NIRF rankingah hian zirna in 6500 chuang category hrang hrangah dilna sing khat chuang an thehlut a ni.

<><><>

IMD

India Meteorological Department (IMD) chuan Central India, hmarchhak leh chhim lamah ni hniih chhung ruah a sur nasa dawn niin a sawi. IMD chaun Rajasthan, Uttar Pradesh, ramchhung khawchhak leh hmarchhakah te ruah hi ni 7 chhung sur thei turin a sawi lawk a. IMD Senior Scientist RK Jenamani chuan Tamil Nadu, Rayalseema, Kerala leh Northeast India ah te Orange alert an ti chhuak tih a sawi..

<><><>

SOLAR MODEL VILLAGE

Sawrkar laipui chuan PM-Surya Ghar-Muft Bijli Yojana hnuai Model Solar Village tihhawhtlin dan tur kaihruaina a ti chhuak Union Ministry of New and Renewable Ministry chuan thuchhuah siamin he scheme hnuaih hian district tinah Model Solar Village pakhat zel din a ni dawn a ti a. He scheme atan hian cheng vaibelchhe 800 chuang dah niin khaw pakhatah cheng vaibelchhe 1 zel Model Solar Village tan pek a ni ang.

He scheme hnuaiā thingtlang khua thlan chhuah te chu mihring 5000 aia tam emaw special category state tan 2000 aia tam chenna a ni tur a ni.

<><><>